

La nuvena di Natali.

C'era un poviru pasturieddru nenti avia chi ci purtari...

ci purtà 'na ricutteddra pi mangiarla la Madunneddra.

E ninna nanna e ninna oh! Dormi dormi e fa la vovò!

E c'era 'na povira lavannara nenti avia chi ci purtari....

ci purtà 'n linzulieddru pi cummigliari lu Bamminieddru....

E ninna nanna e ninna oh! Dormi dormi e fa la vovò!

Chissa nenia, la cantava sempri 'na vicchiareddra di nomu Grazieddra, ogni annu pi la nuvena di Natali. 'Nsiemi a li so vicineddri, diceva lu rusario e cantava canzuni e filastrocchi, davanti lu prisepi, ca ogn'annu cunzava a la so casa.

"Chi beddri tempi eranu chiddri, cuntava sempri la zà Grazieddra, anchi si nun c'era l'abbunanza, tutti eranu sireni, cuntenti sempri di ddru picca ca ognunu aviva. Nnì lu periodu ca s'avvicinava lu Natali, sempri nnì juncivamu a prigari e doppu ognunu di nuantri purtava quarchicosa e preparavamu 'nsiemi di mangiari; cu purtava miennuli, nuci pi fari li 'ngiambelli, l'ova pi lu pani di spagna, cu trava lu cueddru a na gaddrina pi lu brodu, ca a Natali nun putiva mancare. Cu semplicità s'aspittava stu lietu eventù e tutti nnì coinvulgiva assà assà. Preparari lu prisepi era pi tutti 'mpegnu faticusu, ma assà nun nnì pisava, cu piaciri si faciva e la fatica si nni iva. Ognunu di nuantri faciva 'na cosa, cu tingiva li pasturieddri, ca erunu troppu vecchi e avianu bisuognu di 'na rifriscata, cu purtava li ligna pi lu focu, cu costruiva la capanna e li statui di li santi, cu purtava l'erba pi lu pratu, 'nsumma eranu tutti di bona voluntà e in quattru e quattru

otto, lu prisepi si cunzava. Ma ora tutti cosi vinninu già pronti, ma mieglu can un ci piensu, tantu nnì sta casa, prisepi nun si nnì fa."

La vicchina emuziunata, sempri cu piaciri sti mumentu ricurdava. E lu so visu sempri bieddru, 'na lacrima vagnava. Pi la so saluti scarsuliddra, fu custretta a lo sò casa abbannunari. Cu lu figliu Decu, lu dutturi e la nora Paulina sinnì a stari. Beni stava cu iddri, nnì ddra casa, tutti la rispittavanu pi cuscenza, ma li tempi su cangiati, e lu prisepi, nnì la casa di lu figliu Decu, oramà nun si fa chiù. La nora era 'nsgnanti, travagliava assà, la casa, li carusi, la spisa.

"No! troppu chiffari, nun ci puezzu spuntari a prepararari lu prisepi, troppu cosi "n-miezzu, nun mi vueglu affaticari; fazzu sulu l'arbulu cu li scocchi d'oru, aviemmu l'amici d'ammitari e fiura vueglu fari."

Arrispunniva Paulina, quannu la soggira ci parlava di sti cosi.

Grazieddra tanticchia mali ci arristava, ma chi putia fari a la nora nun putiva cumannari.

La vicchiareddra, aviva du bieddri nuputieddri, un masculiddru ca si chiamava Marcu e 'na fimmineddra, can nun si chiamava Grazieddra comu iddra, ma Maria la chiamaru, pi rispiettu di cu, nun sa caputu. 'Ntelligenti e sempri battariusi, ma ci vuliva beni assà e sempri pronta era ad accurdarli. Anchi li carusi ci vulivanu un gran bene, ma mai tiempu avianu, pi stari tanticheddra ad ascuntari, li stori di la nonna e di chiddu ca faciva, quannu a li so tempi si preparava lu Natali.

Ma comu putiva fari? Sti carusi, eranu sempri assà 'mpegnati; li compiti, la palestra, la scola pi lu ballu, lu palluni, lu computer:

"Nonna nun c'è tiempu staiu jucannu."

Arrispunniva Marcu, quannu la nonna lu chiamava.

“Nonnò doppu mi lu cunti, a telefonu staiu parlannu.”

Arrispunniva Ilaria siddriata.

E ancora:

“Basta nonnò, è ‘nutili cuntari chissi cosi, li tempi su cangiati, ormà nun si usa chiù.”

La vicchina, assà ‘ncurlata, decisi di nun ci pruvari chiù.

Lu Natali era a li porti e nun putiennu nesciri, pi li dulura nnì li gammi, assittata nnì la pultruna di la sò stanza, la nuvena si diciva e sempri cu ddri ricordi nnì la menti, cantava a bassa vuci la nenia di ddri tempi.

“Dormi carusu nun chianciri chiù, ora ca è nato lu figliu Gesù”

E c’era ‘n-poviru puvurieddru nenti avia chi ci purtari...

Ci purtà un tancinieddru pi calliari lu bamminieddru...

Dormi caruso nun chianciri chiù ora ca è natu lu dunci Gesù.”

Passavanu li jorna, lu Natali era sempri chiù vicinu e la zà Grazieddra era sempri tristi e siddriata, tutti nnì la famiglia l’avivanu notatu, ma nuddru putia pinsari ca la nustalgia, tantu mali ci putia fari.

Un juernu Marcu, pi casu, passà davanti la stanza di sò nonna, la sintiva ca chianciva e sula ripetiva:

“Quantu eranu beddri ddri jurnati; lu prisepe, li pastura, l’armaluzzi, li picuredra e l’angilieddri quantu eranu bieddri.”

Si firmà a pinsari e surridiennu:

“Nun mi puezzu chiù scurdari, quannu ‘na vota, ficimu lu prisepe ‘n-pirsunaggi e Decu miu, fici lu bamminieddru, quant’era bieddru stu figliuzzu, veru ‘n’angilieddru pariva, cu l’occhi azzurri e la facciuzza russa.”

Asciucannusi li lacrimi a cantari cuntinuà.

Marcu tantu casu nun fici a chissa cosa, e comu nenti a jucari arripiglià.

Lu jurnu doppu e l'antru doppu ancora, sempri la stessa cosa si verificà.

Paulina, ca a la soggira, assà beni veramenti ci vuliva, vidiennula accussì strana, anchi si 'mprisciata, sempri si quarchi cosa aviva, ci addumannava, ma la soggira arrispunniva, ca eranu li dulura ca la tinianu 'ngustiata.

'Na sira, la nonna già era curcata, e Paulina a li figli addumannà:

"Chi avi la nonna? A mia, mi pari strana, nun è ca vuantri sapiti quarchicosa? Nu è ca la trattati mali veru? "

Arrispunnì Marcu:

"Mah! chi avi, l'antru juornu sintiva ca chianciva e doppu prigava e cantava cosi strani, mah chi avi?"

"Mamà la nonna è granni, rispunnì Ilaria, avi li dulura, nuantri sempri beni n'ammu cumpurtatu, ma forsi cà, nun voli chiù ristari? Stammuci attenti e vidiemmu di capiri pi putirla aiutari."

"Mi raccumannu, dissi Paulina, si quarcunu di nuantri caspisci quarchicosa, dicitimillu subito chiddru ca a la nonna 'n-testa pò passari."

Un pomeriggio, Marcu , cu li so amici, jucava a lu palluni vicinu a la chiesa di Santa Chiara, tutt'a na vota, sintì cantari, adaju adaju, li canzuni ca la nonna canusciva e ad ascuntari si firmà, Sergiu, lu sò amicu, lu palluni pusà diciennu:

"Marcù, io pi stasira nun puezzu jucari chiù, cu ma nonna a la nuvena vaiu a cantari, Don Ginu, a fari cuntutu ca 'ncumencia la funzioni, nnì vidiemmu dumani. Vò viniri anchi tu cu nuantri a

prigari, tu nun sa quantu è bellu, diciemmu la nuvena, cantammu davanti lu prisepe e poi Don Ginu nnì permitti di jucari e fin'ancu li dolcini nnì mangiammu, si vua viniri, ti minti vicinu a nuantri pi cantari."

Marcu, taliava lu palluni, era 'ndecisu, ma vidiva tanta genti ca trasiva nnì la chiesa, fimmini anziani, giovani, uomini, piciliddri; diversu si sintiva, e nnì ddru mumentu, desideriu aviva di ascuntari la nuvena e di cantari cu Grazieddra la sò nonna, lu Natali e murtificatu all'amicu arrispunnì:

"Mà nonna, nun po' viniri, nun po' camminari, ma sugnu curiusu e cu vuantri a sta nuvena vuegliu partecipari."

Quannu la funzioni finì, Marcu cunfusu, prescia aviva di turnari intra, a tutti aviva a comunicari chiddru ca nnì la testa ci passava. Quannu tutti eranu a tavola pi la cena, aspittà ca la nonna iva a durmiri e rivoltu a tutti 'ncumincià:

"Iu chist'annu nun vuogliu rialu pi natali."

Dissi seriu, seriu, tutti l'ascuntavanu miravigliati.

"'Na play station vuliva, comu mai ci rinuncià", s'addumannà so matri preoccupata.

"Nun c'è di miraviglairisi, nun vuogliu nenti, la nuvena cu la nonna davanti a lu prisepe vuogli diri, perciò pi prepararlu, mi vuogliu organizzari. Mamma, la nonna era pi chissu ca chiancia. Stasira, cu Sergiu, mi nnì ivu a Santa Chiara, c'era Don Ginu, ca diciva la nuvena, tutti prigavanu, cantavanu davanti lu prisepe, era tantu bellu, ca tuttu paria veru, e subito a la nonna mi vinni di pinsari, eranu li stessi versi, ca ci sintivu canticchiari."

"Bravu Marcuzzu, dissi Ilaria, ha ragioni, la nonna era abituata a fari chissi cosi e nnì nuantri chissu nun truvà, faciemmulu lu prisepe e vidiemmu comu va!"

Decu e Paulina emuziunati:

“Iu nun putia pinsari ca si l'avissi pigliatu a cussi assà, dissi Paulina, mi veni di chianciri, fuvu iu a diri ca lu prisepi nun si putiva fari, pi la fatica ca mi putia purtari, ma ora anch'iu sugnu d'accordu, allibbirtammunni ci su tanti cosi d'accattari, lu cunzammu nnì lu saluni, chiamammu tutti li so amici e a Don Ginu ci chidiemmu si la nuvena veni a celebrari e stu prisepi a binidiri.”

“Va beni, dissi Decu emuziunatu, ma iu haiu pinsatu 'na cosa megliu assà. 'Na scatula haiu sempri gilusamenti cunsirvatu, è nnì lu garage, ci piensi Pauli? ddra scatula di latta tutta russa. Ddra intra ci tiegnu li pastura, di quannu era ancora picciliddu, su viecchi, vidiemmu d'aggiustarli, ma sugnu sicuru, ca a ma matri, chissa cosa, ci farà piaciri, pirchè iddra, nun sapi ca ddri statuini, ancora su sarbati; sicuramenti li pensa oramà pirduti. Allora Marcù, cu mia nnì lu garage, pigliammu subito sta scatula e vidiemmu li statui 'n chi condizioni su.”

Tutti quattru, aiutati di l'amici e di lu parrucu, organizzaru tutti cosi.

Finalmenti tuttu era prontu. Oramà, mancavanu l'ultimi du jorna a lu Natali.

Drru pomeriggiu, Marcu, trasì nnì la stanza di sò nonna e abbrazzannula ci addumannà:

“Nonnò, m'accumpagni nnì lu salottu pi favuri? Haiu 'na cosa ca ti vuoi mustrari,”

Grazieddra a sti paroli si stranizzà:

“Marcù, gioia mia, lu sa can nun puezzu caminari, siemmu sulì, la mamma è fora e lu papà a travagliari, si cadu comu faciemmu a cu amma chiamari?”

“Nun ti preoccupari, nonnò t’aiutu iu, adaju adaju. Nun ti puezzu purtari nnì la to stanza, chiddru ca ti vuogliu fari vidìri, nun ti scantari.”

La nunnina, abbraccettu a lu niputi, trasì nnì lu salottu. La luci era astutata, tuttannavota la luci s’addrumà, tutti a battiri li manu e a cantari ‘ncuminciaru. Graziddruzza emozionata, li lacrimi liberi lassà.

“Ma chissi, esclamà miravigliata, nun mi pari veru, su li vecchi pastura di lu viecchiu ma prisepi, comu mai, su arriè cà nun s’aviavu jttatu?”

Talià a so figliu Decu e lu ringrazià, pirchè pinsava, anchi pi iddru, ddri statui, un significatu avianu e piccatu era, si s’avissiru pirdutu. Don Ginu l’abbrazzà e a farisi curaggiu cunsiglià. La zà Grazieddra, si dissi la nuvena cu l’amici, davanti lu prisepi di li tempi sò, li neni di allura ricordava e taliannu a tutti emozunata ringraziava.

Marcu e Ilaria, doppu st’esperienza, chiù vicini sunnu a la sò nonna, e suddisfatti di vidirla cuntenti, fannu chiù spissu narrarisi li cunta!

Benedetta !

Caniattì 14 novembre 2008

Pagina principale: <http://www.solfano.it>